

## **Bluet** von Corinne Dobler

Überall Bluet und das usgrechnet  
am ekligschte ort  
wos eim breiche chan

wod in zug igstige bisch  
hesch gmerkt  
hm da isch öppis nöd so wies sött si  
hesch di ufs wc verzoge  
und hesch si gseh  
die bluetigi bescherig

De zug holperet uf sine schine  
Du versuechsch s gliichgwicht zhalte  
Währenddem du das malheur  
Irgendwie  
Z behebe versuechsch

Wieso genau hüt und jetzt

Binde hesch au keini debi  
Und das wc papier vom zug isch...naja

Wenigschtens das mal kei buchchrämpf  
De tag chönti also na klappe  
Und all dini termin chöntsche na ihalte  
Und ja vilicht schaffsch es  
Dass es niemert merkt  
Dass du dini täg hesch  
Blüetisch  
Liidisch

funktioniere muesch  
Und brav dis programm abspuele

Hoffentlich gsehts niemert  
Hoffentlich merkst niemert  
Hoffentlich schmökcts niemert

Wenns niemert merkt  
Isch alles guet

Mit dem cheibe Bluet

Gopf geschter  
Geschter isches mit dem Bluet na andersch gsi  
Du erinnerisch dich dütlich

Wies still gsi isch im ruum

Me hetti jedi nadle ghört uf de Bode gheie  
Es isch gsi als hettet alli versammlete Mensche  
D luft a ghalte  
Wo du vorne gstande bisch  
Und gredt hesch

**Das isch mis bluet**  
Isch din Satz dur de Ruum ghalt  
**Wo oi zguet chunnt**  
**Es erinnert oi a de bund won ich mit oi han**  
**Vergessend das ned**

Alles isch still gsi

Und het bannt uf de Kelch lueget  
wo du id Höchi gstrecket hesch  
Sis bluet  
Das het e bsunderi bedütig  
E firlichi  
Heilig Stimmig breitet sich us

Still stönd alli versammlete Mensche uf  
Und gänd fürre  
Trinked adächtig usem Kelch

Vo dem Bluet  
Also rein symbolisch natürlich  
Es isch ja nume Trubesaft  
Und doch  
Lit öppis heiligs drüber  
Denn die wo vom Bluet trinked  
glaubed  
dass es ihne hilft  
heiler z werde  
und das was zerbroche isch  
wieder zemegsetzt wird  
das wo gierig, truarig, enttüscht, verzwiflet, rachsüchtig i ihne isch  
zur rueh chunnt  
und sie glaube sogar  
dass die wo usse gstände sind  
usegheit us de gmeinschaft  
wieder en Teil vo ihre werded  
Use us schuld, scham und sünde  
Alles wird verwandlet  
Alles chunnt wieder is Lot  
Dank dem Bluet

Aber das isch gester gsi  
Jetzt het dis Bluetvergüsse  
En anderi würkig  
Inzwösche hesch s Bluet chöne wegputze  
D Händ gwäsche  
Gasch zrugg is a dim Platz

Ah da lit am Bode ja es 20 min  
D Schlagziile uf de Titelsiite springt dich grad a:  
Die Erde blutet aus.  
Das Ende der Menschheit naht.

Du gspürsch grad wie i dem Moment wieder en Schwall Bluet us dir useflüsst  
fühlsch grad mit  
mit dere Erde wo au ihres Bluet mue la wie du  
Ja au Mueter Erde au du blüetisch us  
und jede nimmt sich was er brucht vo dir  
nei nöd nume was er brucht  
vil meh  
als das  
ahüfe  
scheffle  
sammle  
gnueg isch nöd gnued  
meh  
vill meh  
meh ässe  
meh rohstoff  
meh platz  
meh vo allem  
alles vo dir

und ich fühl dir na  
muetter erde  
du gisch dich hi  
und mir nehmets mit vollne hend, bagger und traktore  
alles wird abtransportiert was me verwerte chan  
mir nehmets als ghörtis üs  
und alles vo dir wird brucht  
verbrucheds  
bis nüt meh isch  
du usbrennt bisch

mini Hand griift nach de  
de Ziitig vom Bode und schnell verschwindet sie  
zwüsched Gsäss und Sitz  
eifach zur Sicherheit  
falls es dureblüetet  
dass nöd grad de Zugssitz volle isch  
und du luegsch zum Fenster us

Ja Wie wär s Lebe  
Wenn alli wo sich higebed  
Mit ihrem Bluet  
i de mitti vo de Gmeinschaft wäred  
so wie de Ma mit sim Bluet im Kelch wo alli druf lueged

Was wäri  
Wenn die wo gebed  
Üsi Ufmerksamkeit hetted

Und Nöd die wo sich s nehmend  
Ahüfed  
usnützed  
und alles usschlachtet

Es lauft schief uf dere Welt  
usser bim Abigmahl  
dört wird D Higab gfiret  
aber überall suscht wird si usgnützt

Es tuet mir leid  
Für dich Mueter Erde  
Und es tuet mir leid für oi  
Ihr Fraue uf dere Erde druf

Mir getraued ois nüme d Wiblichkeit z fiire  
Und das was sie usmacht  
Higab, Fürsorg, Zärtlichkeit  
Und s opfer  
Ja s Opfer  
Wo du Frau de Menschheit machsch  
Din Körper wo du schenksch  
Damit Lebe wird  
Din straffi buch  
Die schöne brüscht  
Dini intakti huut  
Dini Ziit  
dini Bedingigslosi liebi  
damit das Lebe uf dere Erde witergaht  
das interessiert niemert  
niemert ehrt dich für das  
oder priist dich Frau  
zeichneti vom Lebe

Nei, das was ich gseh isch

dass dini Wiblichkeit  
zugunste vo leistig und fortschritt  
vo schöner, meh und besser  
gopferet wird

du bischt z betruure frau  
muesch dini wiblichkeit verstecke  
zu im wettbewerb um erfolg und macht chöne mitzmache  
will du angscht hesch  
nöd ernscht gna zwerde  
oder kei bestand zha  
will du ebe e frau bisch

wellere frau wärs nöd pinlich  
zsege  
ich chan hüt nöd ich han mini mens  
welli frau het nöd angscht  
am arbetsplatz vo ihrere schwangerschaft z verzelle  
us angscht vor reaktione vo de andere  
jetzt machsch de andere umständ  
jetzt wirds kompliziert  
wege dir  
und will du unbedingt es chind muesch ha

welli frau het nöd angscht dass ihres chind chrank wird  
und verbarkeit vo arbeit und familie wieder mal meh nume en leeri blase isch  
und sich öpper chönti beschwere  
wills müehsam isch mit ihre  
ihrne bedürfnis und ihrem chind

drum bisch du frau  
längsch e glichsinnti vo mueter erde  
und nimmsch selber alles vo dir  
damit du gnüegsch  
bis nüt meh chunnt

Aber stell dir nur eimal vor  
Wie d welt wär  
Wenn wiblichkeit  
Higab und Fürsorg  
Heilig wär  
Und dis Bluet gfiret wür werde

Mit eim Ruck haltet de zug a  
Ich gspür wienen schwall bluet us mir use flüsst  
Aber etz bini acho und  
D Zilitig isch zum Glück nanig rot  
Es Glück  
Ich bin namal devo cho  
Niemert het öppis gmerkt